

**Pas nafi Hasan digugurkan
Utusan Online
December 12, 2011
Oleh MOHD. AINUDDIN ALIFF SALEHUDEN**

SHAH ALAM 11 Dis. – Pas menafikan dakwaan kemungkinan Exco Hal Ehwal Agama Islam, Adat-Adat Melayu, Infrastruktur dan kemudahan Awam Selangor, Datuk Dr. Hasan Ali digugurkan sebagai calon pada Pilihan Raya Umum Ke-13 (PRU-13) akan datang.

Presidennya, Datuk Seri Abdul Hadi Awang berkata, dakwaan tersebut nyata tidak benar kerana pihaknya masih belum berbincang mengenai soal calon untuk mewakili Pas pada PRU-13 nanti.

Katanya, soal calon itu hanya boleh disahkan selepas proses penamaan calon diadakan memandangkan tidak ada siapa yang tahu bila PRU-13 akan diadakan.

“Tak betul... tak betul... itu cakap surat khabar,” katanya kepada pemberita selepas melancarkan risalah Negara Berkeadilan: Tawaran Pas di Kompleks Perbadanan Kemajuan Negeri Selangor (PKNS), di sini hari ini.

Hadir sama ialah Timbalan Presiden Pas, Mohamad Sabu, Naib Presiden, Salahuddin Ayub dan Setiausaha Agung Pas, Datuk Mustafa Ali.

Mingguan Malaysia hari ini memetik sumber sebagai berkata, Hasan yang juga merupakan Ahli Dewan Undangan (ADUN) Gombak Setia itu telah ‘disingkirkan’ oleh Pas Selangor dan pada masa sama pengguguran tersebut telah mendapat restu daripada Pas pusat.

Selain itu, Mingguan Malaysia turut melaporkan Pas Pusat juga akan menggugurkan beberapa pemimpin Pas lain termasuk bekas Timbalan Presidennya, Nasharuddin Mat Isa yang selama ini tidak disenangi oleh kumpulan pro Datuk Seri Anwar Ibrahim atau dikenali sebagai Erdogan.

Berita mengenai pengguguran Hasan itu telah diperkatakan sejak kebelakangan ini, malah Jumaat lalu, sebuah portal berita propembangkang ada melaporkan kenyataan Ketua Penerangan PAS Selangor, Saari Sungib bahawa Hasan berkemungkinan besar akan digugurkan sebagai calon parti itu pada PRU-13.

Sementara itu, Hasan dijangka mengadakan sidang akhbar di kediaman beliau di Kuala Lumpur, esok bagi mengulas isu berkenaan.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=1212&pub=Utusan_Malaysia&sec=Politik&pg=po_04.htm